



Unga siunnersuut: Qalerallit avaleraasartuullu avataasiorluni aalisarnermi pisari-neqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat

Saqquummiussissut

(Aningaasaqarnermut Aatsitassanullu Naalakkersuisoq)

Qalerallit avaleraasartuullu avataasiorluni aalisarnermi pisarineqartut pillugit Naalakkersuisut saqqummiussaat oqaaseqarfingissavarput.

Inuaqatigiit pisuussutaat uumassusillit uumaatsullu soorunami aningaasarsiornikkut inuaqatigiinni inunnnullu amerlanerpaanut sunniuteqartumik iluaqutaanissaat nunallu aningaasarsiорneranut nukittorsaataanissaat pingaartorujussuusoq Partii Naleqqamiit oqaatigerusupparput.

Aningaasarsiornikkut aalisartut nukittuumik inisisimalissappata Partii Naleqqamiit isumaqarluinnarpugut aalisartut namminneq avammut niuernerulersinnaanerat aqqutissiuuttariaqartoq, tassami pinngitsaalisaaallutik tunitsivinnut tulaassuinnartarnerat, akinillu appasisorujussuarnik ilaatigut akilersorneqartarnerit qimakkiartorneqalissagaluararmata. Taamaaliornikkut inuaqatigiinnut kalaallinut aalisartunullu toqqaannartumik aningaasat isaatinneqartut qularnanngivissumik annertuseriarujussuassagaluararmata.

Avataasiorluni aalisarnermi qalerallit avaleraasartuut ammassaat ammassassuillu akitsuutissaatut siunnersuut eqqarsarnartoqartipparput, imaanngikkaluarpoq akiliisoqassanngitsumik eqqarsaartugut, kisianniuna inatsisissatut siunnersuut qanoq paassisallugu ajornartorsiutigippit.

Ilaatigummi kingunissai nalullugit inatsisiliorniarsarigatta, aammalu inatsisissamik siunnersuuteqartut Naalakkersuisut nalummassuk qanoq akiitsuut eqqunneqarpat kinguneqarsinnaanersoq.

Isumaqarluinnarpugut aalisakkanik avammut nioqqutissiortut paaseqatigineqarnissaat pingaartittariaqaripput, tassami aningaasarsiornikkut nukittunerulersinnaanerput qanoq iliornikkut anguneqarsinnaanersoq attuumassuteqartut peqatigalugit ingerlakkaanni suliffissaqartitsinikkut aningaasarsiornikkullu pitsaanerusumik angusaqarsinnaagatta, tassami isertitsiniannarluta akitsuumik eqqussigutta kingunissaai suussanersut nalullugit aalajangersaanissarput nangiarnarmat.

Tunumi avataasiorluni aalisakkanik akitsuuteqartitsinissaq ajorinngilarput, aammalu akitsuutit assigiinngitsunngorlugit Kalaallit aalisariutaannut aammalu nunat allamiut aalisariutaataat akisunerusumik akiliisarnissaannik isumaq ajorinngilarput tapersorsorlugulu.

Nunatta aalisarnikkut annertunerpaamik isaatitsissuteqarnera tamatta ilisimalluarparput, tamannalu ingerlalluartariaqarmat akuersaarsinnaanngilarput ilimagisat eqqoriaanerillu kisiisa tunngavigalugit aaqqissuussiniartassanngitsugut Partii Naleqqamiit piumasaraarput.

Ineriigaanerusunik avammut nioqqutissiornissaq qanoq anguneqarsinnaanersoq isummersoqatigiinnikkut ingerlattariaqarparput, tassami nalunngilarput aasaanerani sumiiffinni arlalinni sulisussaqarnikkut amigaateqartarluta, akitsuusersuinissammi aamma kingunerisinnaavaa ilaatigut aalisartut tunisassiorfinnut tunioraanerisa killilersuiffigineqarsinnaanerat, ilaatigullu aamma aalisartunut tunisat akiisa appaaffigineqarartarsinnaanerat ilimagissallugu, tamakkuuppullu ersarissumik qulaajagassat inatsisissarmi aaqqissuussinnaanngilarput kingunissaai nalullugu.

Ilaatigummi naalakkersuisut saqqummiussaanni nassuaatini allassimasoq imaappoq
"Isertinneqartussat akileraarutinut A-nut akitsuutinullu qanoq agguataarsimanissaat maannakkuugallartoq eqqoriarneqarsinnaanngilaq, akitsuutimmi tunisassiorfinni sutigut allannguuteqartitsinnaanera pillugu paasissutissat ilaatigut pigineqanngimmata"

Taavalu ilanngullugu paaserusupparpu Inatsissami siunnersutigineqartoq tassalu *"Qalerallit immannguaannaq suliat suliarineqanngitsulluunnit akitsuutaat"*

Tamanna tunisassiotrunut uagutsinullu assut paasiuminaappoq tassami inatsisiliorsinnaagunannginnatta imannguaannaq suliat qanoq paassisallugit ajornartorsiutaasumik, Partii Naleqqamiit kissaatigissavarput imannguaq suliat qanoq paasineqassanersut naalakkersuisut nassuaqqullugit.

Taavalu ilanngullugu paaserusupparput ukiuni missingersuusiorfiusuni tullerni 50-milliunukkaat isertitassat Naalakkersuisut oqaatigimmassuk qaleralileriffinni qaleralinnut suliarineqarsimanngitsunut akitsuuteqartitsinissaq, tamannalu suli tunisassiotrunut annerujussuarmik kingunerlussinnaanera Partii Naleqqamiit ernumatigaarput.

Taamatut oqaaseqarluta Ataatsimiititaliami suliarineqarnissaa innersuussutigaarput.

Hans Enoksen